

四庫全書

經部

欽定四庫全書

讀禮通考卷九十五

刑部尚書徐乾學撰

葬具一

乾學案喪具者自初終至下窆凡附於身者
附於棺者及筮宅祖奠穿隧掩坎之所需皆
是也檀弓言喪具君子恥具注以辟不懷也
疏引宣八年左傳云禮卜葬先遠日辟不懷
也懷思也葬用近日則是不思念其親今未

即辨具是辟不思親之事也又曰一日二日而可為也者君子弗為則苟非一二日易為之事其必講求之精矣古人六十歲制七十時制八十月制九十日脩惟絞紵衾冒之屬死而後制但云辟不懷而已臨時倉卒迷瞶為之奈何故凡喪具之載在禮經及歷代令甲所著略采記如左

掩



聶氏本



劉氏本

士喪禮掩練帛廣終幅長五尺析其末

注裏首也析其末為將結於頤

下又還結於項中疏掩若今人幘頭但死者以後二腳於頤下結之與生人為異也

教繼公曰析其末者兩端皆析而為二也


瑱

士喪禮瑱用白纊


注瑱充耳纊新縣疏生時人君用玉臣用象今死者直用纊塞耳而已

異於生也

幘目



聶氏本



劉氏本

士喪禮幘目用緇方尺二寸耎裏著組繫

注幘目覆面者也幘若詩

曰葛藟縈之之縈耎赤也著充之以絮也組繫為可結也疏四角有繫於後結之

教繼公曰此雖覆面之物然以幘目為名其義似主於耳也

商祝掩瑱設幘目

注掩者先結頤下既瑱幘目乃還結項也疏掩有四腳後二腳先結頤

下無所妨故先結之若即以前二腳向後結於項則掩於耳反面兩邊瑱與幘目無所施故先結頤下待設瑱塞耳并施幘目乃結項後也

故繼公曰設掩者既結頤下即還結項中急欲覆其形也掩其前後而兩旁猶開故可以瑱幘目當面設之加於掩之上交結於後既設此則掩旁亦固矣

簪



鼎氏本

士喪禮髻笄用桑長四寸緩中

注桑之為言喪也用為笄取其名也緩笄之中

夾以安髮 疏以髻為髻義取以髮會聚之意四寸者僅取安髻而已

教繼公曰會髮為紒曰髻今南語猶然云髻笄者明其不纚也生時擗而纚乃加笄此於生時為冠內之笄但不用桑耳其或用長笄則去之不并也用也長笄者冕弁之笄也婦人有長笄無短笄下云髻用組此不言文略耳

髻用組乃笄

注用組束髮也

鼎崇義曰髻結也取會聚之義謂先以組束髮乃笄也笄長四寸者不冠故也若冠則笄長矣古之死者但髻笄而不冠婦人但髻而無笄記云其母之喪髻無笄注云猶丈夫之不冠也王肅撰家語云孔子喪

有冠者長也緩中謂兩頭闊中央
狹狹則於髮安故注云以安髮也

--	--	--	--	--	--	--	--

布巾

方二尺二寸
覆死者面

劉氏本

士喪禮布巾環幅不鑿

注環幅廣袤等也不鑿者士之子親含反其巾而已大夫以上

賓為之含當口

鑿之嫌有惡

故繼公曰布巾不鑿士之制然也此云

不鑿則有當鑿者矣鑿者其君禮與

雜記鑿巾以飯公羊賈為之也

注士親飯必發其巾大夫以上賓為飯焉則有

鑿巾

疏大夫以上貴故使賓為其親含恐尸為賓所



憎穢

故設巾覆尸面而當口鑿穿之令含得入口也士

賤不得使賓子自含其親但露面

而含耳鑿巾則是自憎穢其親也


冒



鼎氏本

質

殺



劉氏本

士喪禮冒緇質長與手齊經殺掩足

注冒韜尸者制如直囊上曰質下曰

殺質正也其用之先以殺韜足而上後以質韜首而下齊手上玄上纁象天地也凡冒質長與手齊殺三尺

雜記冒者何也所以揜形也自襲以至小斂不設冒則

形是以襲而后設冒也

注言設冒者為其形人將惡之也

喪大記君錦冒黼殺綴旁七大夫玄冒黼殺綴旁五士

緇冒黼殺綴旁三凡冒質長與手齊殺三尺

注冒者既襲所以韜

尸重形也

疏冒有質殺者作兩囊各縫合一頭又縫連一邊餘一邊不縫兩囊皆然也綴旁七者不縫之邊


上下安七帶綴以結之大夫五士三者尊卑之差也

鼎崇義曰質與殺相接之處則以線綴之使相連而不用帶


劉績曰冒上身者方正故曰質冒下身者漸狹故曰殺與手齊掩足準死者身而為之初無寸量也

劉熙釋名以囊韜其形曰冒覆其形使勿惡也

衾



本氏鼎



本氏劉

士喪禮緇衾纁裏無紃

注被識也。斂衣或倒被無別於前後也。

喪大記小斂君錦衾大夫縞衾士緇衾皆一

疏君大夫士各用一


衾故云皆一

大斂布紵二衾君大夫士一也

注二衾者或覆之或薦之疏

小斂君大夫士各一衾至大斂各加一衾為二衾

紵



聶氏本

喪大記紵五幅無紃

注紃以組類為之綴之領側若今被識生時禪被有識死者去之異

也於生

皇甫侃曰
紵禪被也

夷衾



聶氏本

衾當如冒	士緇上靸下	大夫玄上靸下	君錦上靸下
------	-------	--------	-------

劉氏本

喪大記自小斂以往用夷衾夷衾質殺之裁猶冒也

疏


衾所用上齊於手下三尺所用繒色及長短
制度如冒之質殺但不復為囊及旁緹也

絞

小
絞
絞



大
絞
絞



聶氏本

喪大記小斂布絞縮者一橫者三

注絞既斂所用束堅之者縮從也疏小

斂之衣以布為絞從者一幅豎置

於尸下橫者三幅亦

在尸下從者在橫者之上每幅之末

析為三片以結束

為便也 大斂布絞縮者三橫者五

注小斂之絞也廣終幅析其末以為堅之強也

大斂之絞一幅三析周之以為堅

之急也疏縮者三

取布一幅裂作三片直周之兩頭

裂中央不通橫者五



又取布二幅分裂作六

片周五片橫於縮下


釋名已衣所以束之曰絞紛絞交也交結之也紛禁

也禁繫之也

明衣



本氏鼎



劉氏本

士喪禮明衣裳用布

注所以親身為圭潔也

記設明衣婦人則設中帶

注中帶若今之禪褌

明衣裳用幕布袂屬幅長下膝有前後裳不辟長及鼂

緣紕絳緇純

注幕布帷幕之布屬幅不削幅也長下膝又有裳於蔽下體深也不辟積也鼂足跗

也一染謂之緣今紅也飾裳在幅曰紕在下曰絳七入為緇緇黑色也飾衣曰純謂領與袂衣以緇裳以緣象

天地也

疏明衣裳用幕布則衣裳同用幕布云袂屬

幅長下膝者唯據衣而言以其下別云裳故也云屬幅

不削幅者布幅二尺二寸凡用布皆削去邊幅旁一寸

為二寸計之則此不削幅謂緣使相著還以袂二尺二

寸云長下膝者謂為此衣長至膝下云又有裳於蔽下

體深者凡為衣以其有裳故不至膝下此又有裳而言

膝下故云於蔽下體深也不辟積者以其衣服不動不假上狹下寬也

故繼公曰必云袂屬幅者嫌明衣或異於生也然則吉服之袂屬幅也明矣裳前三幅後四幅不辟之則其要廣而前後相掩者深旁不開體不見矣長及蔽為蔽足也明衣之長下膝具裳之制復如是皆為重

形且異于生也

劉績曰燕禮幕用綌若錫則此用錫布也

角枕

周禮天官玉府大喪共含玉復衣裳角枕角柩

注角枕以枕尸

也

角
和



劉氏本

士喪禮楔齒用角柶

注為將含恐其口閉急也疏此角柶其形與扳醴角柶制別屈之

如乾中央入口兩末向上

喪大記小臣楔齒用角柶

疏柶以角為之長六寸兩頭曲屈將含恐口閉急故使小

臣以柶拄張尸齒令開也

劉續曰柶狀如匕以角為之滑也

燕几



劉氏本

士喪禮綴足用燕几

注綴猶拘也為將履恐其辟戾也

記綴足用燕几校在南御者坐持之

注校脰也尸南首几脰在南以拘足

則不得辟戾矣

教繼公曰校几左廉之名校在南則橫設也几之為制前後狹而左右差廣綴足宜寬故橫設之必校在南者生時設几左廉近人故故之也坐持之則御者亦在牀矣其於几之北與

發大記綴足用燕几君大夫士一也

疏尸應著屨恐足辟戾亦使小臣側几于

足今几脚南出綴拘尸足而邊今直不辟戾也

劉績曰士喪禮綴足用燕几校在南御者持之古几猶今道家之几形如半環三足坐則曲者向身可以


憑以曲者兩端著地故綴足御者一人坐持上足也
語林曰直木橫施植其兩足便為憑几何必以蟠鵠
膝曲木抱腰則直几後世之制也阮瞻云几長五尺
高二尺廣二尺馬融以為長三尺舊圖以為几兩端
赤中
央黑

檀弓毀竈以綴足

疏此論殷周禮異周人綴足用燕几
故不毀竈毀竈綴足者一則示死無

復飲食二則恐死人冷僵足辟戾不可著屨
故用毀竈之覺連綴其足令直可著屨也

握手



本氏翦



劉氏本

士喪禮握手用玄練裏長尺二寸廣五寸牢中旁寸著

組繫

注牢讀為樓樓謂削約握之中央以安手也疏此衣在手故言握手廣五寸牢中旁寸則中央廣

三寸也中央足容四指指一寸則四寸四寸之外仍有八寸皆廣五寸也

記設握裏親膚繫鉤中指結于擊

注擊掌後節中也手無決者以握繫一端

繞擊還從上自貫反與其一端結之疏上文握手用

玄纁裏長尺二寸今裏親膚據從手內置之長尺二寸

中掩之手纁相對也兩端各有繫先以一端繞繫一匝還從上自貫又以一端向上鉤中指反與繞擊者結于

掌後


節中

教繼公曰握手唯一而已與決同設於右手其繫則相關經文詳于設決略於設握故記見之設握之法

以練裏親膚其中央正當於掌右端掩四指之後左
端在其上乃以其組繫環將指之本而與決之繫相
結于擘而連之所謂
設握乃連擊者也

釋名握以物著尸手中使握之也

决



鼎氏本

續極



聶氏本

士喪禮決用正王棘若擇棘組繫續極二

注正善也王棘與擇棘善

理堅韌者皆可以為決極以沓指故弦令不挈也

數繼公曰決與極皆用于右手象生時所有事者也決著右擘極韜食指將指生以象骨為決韋為極死以是二者為之明不用也士生時所用韋極之數無聞以此經推之則亦用二也是其降于君者與然則君之喪其用續極亦三矣

含貝



飯珠



聶氏本

士喪禮貝三實于筭稻米一豆實于筐

注貝水物古者以爲貨筭竹器

升豆四

檀弓飯用米貝弗忍虛也

疏不忍虛其口也

雜記天子飯九貝諸侯七大夫五士三

注此蓋夏時禮也周禮天子飯

玉舍用

周禮天官太宰大喪贊贈玉含玉

注贈玉既窆所以送先王含玉死者口實

天子以玉

春官典瑞大喪共飯玉含玉贈玉

注飯玉碎玉以雜米含玉柱左右頤及在

口中者贈玉蓋璧也疏飯玉者天子飯以黍諸侯飯用粱大夫飯用稷天子之士飯用粱諸侯之士飯用稻其飯用玉亦與米同時舍玉有數有形亦與飯同時行之

天官玉府大喪共舍玉

春秋公羊傳舍者何口實也

注孝子所以實親口也緣生以事死不忍虛其口天

子以珠諸侯以玉大夫以璧士以貝春秋之制也文家加飯以稻米

大戴禮天子飯以珠舍以玉諸侯飯以珠舍以璧大夫士飯以珠舍以貝

禮稽命徵天子飯以珠舍以玉諸侯飯以珠舍以璧

相備也

春秋說題辭口實曰含象生時食也

莊子儒以詩禮發冢大儒曰東方作矣事之何若小
儒曰未解裙襦口中有珠詩曰青青之麥生于陵陂
生不布施死何含珠為儒以金槌控其頤徐剔其頤
無傷口中珠

白虎通德論所以有飯含何緣生食今死不欲虛其
口故含用珠寶物何也有益死者形體故天子飯以

玉諸侯以珠大夫以米士以貝也


釋名含以珠貝含其口中也

玉柙

後漢禮儀志登遐沐浴守宮令蕪東園匠將女執事黃
縣緹繒金縷玉柙如故事

漢舊儀帝崩含以珠纏以緹繒十二重以玉為襦如鎧
狀連縫之以黃金為縷腰以下以玉為札長一尺二寸
半為柙下至足亦縫以黃金縷

浴盤



聶氏本

喪大記浴水用盆沃水用料

疏用盆盛浴水
用料酌盆水

賈公彥曰料酌水器受五升
方有柄挹盆中水以沃尸

夷槃

聶氏本

周禮天官淩人大喪共夷槃冰

注夷之言尸也實冰於夷槃中置之尸牀之下

所以寒尸

士喪禮士有冰用夷槃可也

注謂夏月而君加賜冰也夷槃承尸之槃

喪大記君設大盤造冰焉大夫設夷盤造冰焉士併瓦

盤無冰設牀檀第有枕含一牀襲一牀遷尸于堂又一

牀皆有枕席君大夫士一也


注造猶內也檀第袒簣也謂無席如浴時牀也禮自

仲春之後尸既襲既小斂先內冰盤中乃設牀于其上

不施席而遷尸焉秋涼而止士不用冰以瓦為盤併以盛水耳
疏造冰者造內其冰于盤中置冰於下設牀於上去席檀露第簣浴時無席為漏水也設冰無席為

通寒
氣也

夷牀



鼎崇義曰夷牀以運尸長丈二尺廣七尺旁為四鐶前後亦有鐶為鈕於兩旁以繩直貫中欲下尸則引其直繩諸鈕悉解矣


王昭禹曰夷之言傷也冰盤曰夷盤移尸于堂曰夷堂牀曰夷牀衾曰夷衾皆以哀傷為主

浴牀



聶崇義曰浴牀亦曰夷牀夷之為言尸也長丈二尺廣四尺有四橫上有木第設欄於前而後兩端士漆之大夫加朱飾諸侯畫雲氣天子加禾稼百草華也

駟圭



周禮春官典瑞駟圭璋璧琮琥璜之渠眉疏璧琮以斂

尸

注斂尸於大斂加之圭在左璋在右琥在右璜在足

璧在背琮在腹蓋取象方明神之也疏璧琮者通于


天地

疏此六玉兩頭皆有孔又于兩孔之間為


溝渠于溝之兩畔稍高為眉琢故云以組穿聯之

周密志雅堂雜鈔國朝典故人主升遐皆取太學文
宣王玉圭為斂事定方造歸之

重



本氏聶



本氏劉

士喪禮重木刊鑿之

注木也縣物焉曰重刊斲治鑿之為縣簪孔也士重木長三尺

故繼公曰謂以木為之而加刊鑿也鑿其前為二孔而以簪貫之為縣鬲之用

檀弓重主道也殷主綴重焉周主重徹焉

注始死未作主以重主其

神既虞而埋之乃後作主疏人始死作重猶若木主所以依神故曰重主道也


釋名重死者之資重也含餘米以為粥投之甕而懸之此葬未作主權以重主其神也

開元禮重三品以上長八尺四品五品長七尺六品以下長六尺橫者半之置于庭三分庭一在南以沐之米

為粥實于鬲既實以疎布蓋其口繫于竹筴懸于重木
覆用葦席北向屈兩端交於後西端在上綴以竹筴祝
取銘置于重殯堂前楹下夾以葦席簾門以布又設葦
障於庭

太常因革禮重一品挂鬲六五品以上四六品以下二

明旌



士喪禮為銘各以其物亡則以緇長半幅經末長終幅

廣三寸書名于末曰某氏某之柩竹杠長三尺置于宇

西階上

注銘明旌也雜帛為物大夫之所建也以死者為不可別故以其旗識之亡無也無旗不命之

士也半幅一尺終幅二尺在棺為柩今文銘為旆也杠銘槨也字招也

檀弓銘明旌也以死者為不可別已故以其旗識之

注

旌神明之旌也不可別為形貌不見也

聶崇義曰周禮司常大喪則供銘旌又案司常職云王建太常諸侯建旂孤卿建禮大夫士建物則銘旌亦然但尺數異耳禮緯天子之旌高九仞諸侯七仞大夫五仞士三仞其士喪禮竹杠長三尺則死者以

凡易何也天子九尺諸侯七尺大夫五尺士三尺其旌旗身亦以尺易何也又從遣車之差蓋以喪事畧故也若不命之士則以緇布半幅長一尺纈其末長終幅長二尺也緇纈共長三尺廣三寸書銘于末

崔元凱喪儀銘旌今之旒也天子長丈二尺皆施跗

樹于壙中

開元禮為銘

銘明旌也

以絳充廣幅三品以上長九尺四品

五品長八尺龍首韜杠六品以下長六尺韜杠書某官封之柩置于宇西階上

司馬氏書儀銘旌以絳帛為之廣終幅三品以上長九

尺五品以上八尺六品以下七尺書曰某官某公之柩

官卑曰某君妻曰某封邑某氏若無官封即隨其生前所稱

以竹為杠長準銘旌置

屋西階上

魂帛

朱子家禮魂帛潔白絹為之設櫬于尸南覆以帕置倚

卓其前置魂帛於倚上設香爐杯注酒果于卓子上是

為靈座倚銘旌於倚左侍者朝夕設擲頰奉養之具皆

如平生俟葬畢有祠板則埋魂帛潔地

雜記重既虞而埋之開元禮倣

此今國家亦用之喪令置重一品柱馬六五品以上四
六品以下亦然士民之家未常識也皆用魂帛魂帛亦
主道也禮大夫無主者束帛依神今且從俗貴其簡易
然世俗或用冠帽衣履裝飾如人狀此鄙俚不可從也
又世俗皆畫影置于魂帛之後男子生時有畫像用之
猶無所謂至于婦人生時深居閨闥出則乘輜輶擁蔽
其面既死豈可使畫士直入深室揭掩面之帛
執筆望相畫其容貌此殊為非禮勿可用也
丘濬曰魂帛以白絹為之如世俗所謂同心結者垂
其兩足案魂帛之制本注引溫公說謂用束帛依
神而朱子本文則又謂潔白絹為之考古束帛之制
用絹一匹捲兩端相向而束之結之制無可考近世
行禮之家有結帛為長條而文互穿過如世俗所謂
同心結者上出其首旁出兩耳下垂其餘為兩足有
肖人形以此依人似亦可取雖然用帛
代形本非古禮用束用結二者俱可

文獻通考紹興三十一年五月禮部侍郎金安節等言
竊詳神帛之制雖不經見然考之于古蓋復之遺意也
然古之復者以衣今用神帛招魂其意蓋本于此

棺槨總

易繫辭古之葬者厚衣之以薪葬之中野不封不樹喪
期無數後世聖人易之以棺槨蓋取諸大過

書顧命伯相命士須材

傳召公命士致材
木須待以供喪用

檀弓天子崩虞人致百祀之木可以棺槨者斬之

注虞人掌

山澤之官百祀畿內
百縣之祀也斬伐也
不至者廢其祀刳其人
疏此謂王殯後事也

必取祀木者賀瑒云君者德著幽顯若存則
人神均其慶幸若沒則靈祇等其哀傷也

陳澔曰天子之梓槨以多木為哉百縣之祀其木可
用者悉斬而致之無乃太多乎畿內之美材固不乏

矣奚獨於祠祀斬之乎廢其祀刳其人

又何法之峻乎禮制若此未詳其說

吳澄曰廢其祀刳其人蓋設此辭而令人以見王喪
尤重于神祀也如誓師而曰無敢不供汝則有大刑

是也非果廢之刳之也蓋祀木者神祇所主豈可斬
伐唯為天子采梓木則雖祀木亦斬無或敢占吝者

若或占吝不以其木至是不供王喪為大不
敬故設廢祀刳人之辭使人不敢慢令也

喪大記棺槨之間君容祝大夫容壺士容甒

注間可以藏物因可以

為節疏君容祝者祝如漆桶是諸侯棺槨間所容也
若天子棺槨間則差寬大故司几筵云柏席用崔玄謂
柏槨字摩滅之餘槨席藏中神座之席是也諸侯棺槨
間亦容席故司几筵云柏席諸侯則紛純稍狹于天子
故此云容祝大夫容壺者壺是漏水之器乃大
夫所掌曰士容甒者甒盛酒之器士所用也

方慤曰祝方二尺四寸深一尺八寸壺大一石甒五
斗則其所容之大小可知君必以祝則與狄人設階
義同

左傳成公二年八月宋文公卒槨有四阿棺有翰檜君

子謂華元樂舉於是乎不臣

注四阿四注槨也翰旁飾檜上飾皆王禮疏周禮

匠人云殷人四阿重屋鄭玄云阿棟也四角設棟也是為四注槨也士喪禮云抗木橫三縮二謂於槨之上設

此木從二橫三以負土則士之槨上平也今此槨上四注而下則其上方而尖也禮天子槨題湊諸侯不題湊不題湊則無四阿釋詁云楨榦榦也又曰楨正也築牆所立兩木也榦所以當牆兩邊障土者也榦在牆之旁則知此榦亦在旁也詩云榦榦如星鄭玄云榦謂榦之縫中言其際會之處也會在榦之上知此榦亦在上故為棺旁飾上飾也

家語孔子初仕為中都宰制為養生送死之節為四寸之棺五寸之槨因丘陵為墳不封不樹行之一年而西

方之諸侯則焉

魯國在東方故西方諸侯皆取法

呂氏春秋美棺槨所以備螻蟻也

後漢書趙咨曰棺槨之造自黃帝始

白虎通德論所以有棺槨何所以掩藏形惡也不欲
令孝子見其毀壞也棺之為言貌所以藏尸令貌全
也槨之為言廓所以開廓辟土無令迫棺也 有虞
氏瓦棺今以木何虞尚質故用瓦夏后氏益文故易
之以堅周謂堅木相周無膠漆之用也殷人棺槨有
膠漆之用周人寢文牆置翬加巧飾喪葬之禮緣生
以事死生時無死亦不敢造太古之時穴居野處衣

皮帶革故死衣之以薪內藏不飾中古之時有宮室衣服故衣之幣帛藏以棺槨封樹識表體以象生

劉璋曰凡送死之道唯棺與槨為親身之物孝子所宜盡心初喪之日擇木為棺恐倉卒未得其木灰漆亦未得能堅完或值暑月恐難久留古者國君即位而為柩歲一漆之今人亦有生時自為壽器者此乃猶行其道非豫凶事也其木油杉及栢為上母事高大以為美觀唯棺周於身槨周於棺足矣棺內外皆用布裏漆務令堅實予嘗見前人墓掩壙之後即以松脂溶化灌于棺外其厚尺餘後為人侵掘松脂歲久凝結愈堅斧斤不能加得免大患今有葬者用之可謂宜矣

宋史諸葬不得以石為棺槨及石室其棺槨皆不得雕

鏤彩畫施方牖檻棺內不得藏金寶珠玉

棺

檀弓天子之棺四重

注尚深邃也諸公三重諸侯再重大夫一重士不重

水兕革

棺被之其厚三寸

注以水牛兕牛之革為棺被革各厚三寸合六寸也此為一重

杙棺

一

注所謂杙棺也爾雅曰掇杙也

梓棺二

注所謂屬與大棺

四者皆周

注周匝也凡棺

用能濕之物疏四重者水牛兕牛皮二物為一重杙為第二重屬為第三重大棺為第四重四重凡五物也以次差之上公三重則去水牛餘兕杙屬大棺也侯伯子男再重又去兕餘杙屬大棺大夫一重又去杙餘屬大棺也士不重又去屬唯單用大棺也天子大棺厚八寸屬六寸杙四寸又二皮六寸合二尺四寸也上公去

水牛之三寸餘兕犛屬大棺則合二尺一寸諸侯又去
兕之三寸餘合一尺八寸也列國上卿又除犛四寸餘
合一尺四寸也大夫大棺六寸屬四寸合一尺士則不
重但大棺六寸庶人四寸天子卿大夫文不見者天子
卿大夫並與列國君同若天子之士與諸侯大夫同也
水兕二皮並不能厚三寸故合被之令各厚三寸也二
皮能濕故最在裏近尸也棺者槨也材亦能濕故次皮
也唯一種故云一也諸侯無革則以柩親尸所謂梓棺
也即前言君即位為犛是也柩即槨木鄭引爾雅曰槨
柩一物二名名槨又名柩也梓棺二者柩棺之外又有
屬棺屬棺之外又有大棺大棺與屬棺並用梓故云二
也四者皆周者謂四重之棺上下四方悉周匝唯槨不
周下有茵上有抗席故也

后木曰喪吾聞諸縣子曰夫喪不可不深長思也

注后木魯

孝公子惠伯鞏之後

買棺外內易我死則亦然

注此孝子之事非所託

徐師曾曰言養生不足以當大事唯送死可以當大事人子事親舍是無所用其力一有不謹則他日不可復追此所以不可不深長思也是以買棺藏親必外內易治不少有後日之悔此當深思之大者故特舉而言之縣子此言可為萬世人子喪親之法矣然此乃人子所當自盡非父母豫屬者而后未乃曰吾死則亦然則過為身後之慮矣

衛有大史曰柳莊寢疾公曰若疾革雖當祭必告公再拜稽首請于尸曰有臣柳莊也者非寡人之臣社稷之臣也聞之死請往不釋服而往遂以禭之與之邑襄氏

與縣潘氏書而納諸棺曰世世萬子孫毋變也

陳乾昔寢疾屬其兄弟而命其子尊已曰如我死則必大為我棺使吾二婢子夾我陳乾昔死其子曰以殉葬非禮也況又同棺乎弗果殺

喪大記君大棺八寸屬六寸槨四寸上大夫大棺八寸

屬六寸下大夫大棺六寸屬四寸士棺六寸

注大棺棺之在表者

也檀弓曰天子之棺四重水兕革棺被之其厚三寸也棺一梓棺二四者皆周此以內說而出也然則大棺及屬用梓槨用柁以是差之上公革棺不被三重也諸侯無革棺再重也大夫無槨一重也士無屬不重也庶人

之棺四寸上大大夫謂列國之卿也趙簡子云不設屬禭
時僭也疏檀弓從內而說以次出外謂近尸有水革
次外有兕革次外有禭次外有屬次外有大棺此先云
大棺及屬乃始云禭是從外鄉內而說故知大棺及屬
當梓棺也禭當抱棺也

君蓋用漆三衽三束大夫蓋用漆二衽二束士蓋不用

漆二衽二束

注用漆者塗合牝牡之中也衽小要也疏蓋棺上蓋用漆謂漆其衽合縫處也衽

謂燕尾合棺縫際也束謂以皮束棺也棺兩邊各三衽
三束衽上輒以牛皮束之大夫士亦然檀弓云棺束縮
二衡三者據君言也若大夫士橫唯二束此文是也

孟子孟子自齊葬于魯反于齊止于贏充虞請曰前日

不知虞之不肖使虞惇匠事嚴虞不敢請今願竊有請

也木若以美然

集注孟子仕於齊喪母歸葬于魯嬴齊南邑充虞孟子弟子嘗董治作棺之事

者也嚴急也木棺木也以美太美也

曰古者棺槨無度中古棺七寸槨稱

之自天子達于庶人非直為觀美也然後盡于人心

集注

度厚薄尺寸也中古周公制禮時也槨稱之與棺相稱也欲其堅厚久遠非特為人觀視之美而已不得

不可以為悅無財不可以為悅得之為有財古之人皆

用之吾何為獨不然

集注不得謂法制所不當得得之為有財言得之而又為有財也

且比化者無使土親膚于人心獨無忤乎

集注比猶為也化者死者

也愷快也言為死者不使土親近其肌膚于人子之心豈不快然無所恨乎

吾聞之也君子

不以天下儉其親

集注送終之禮所當得為而不自盡是為天下愛惜此物而薄于吾親也

墨子古聖王制為葬埋之法曰棺三寸足以朽體衣

衾三領足以覆惡則止矣 子墨子制為葬埋之法

曰棺三寸足以朽骨衣三領足以朽肉

許慎說文棺闕也所以掩尸

釋名棺闕也闕閉也

司馬溫公曰棺欲厚然太厚則重而難以致遠又不必高大占地使壙中寬易致摧毀宜深戒之樽雖聖

人所制自古用之然板木歲久終歸腐爛徒使壙中寬大不能牢固不若不用之為愈也孔子葬鯀有棺而無槨又許貧者還葬而無槨今不欲用非為貧者乃欲保安亡者耳

二程全書古人之葬欲比化者不使土親膚今竒玩之物尚保藏固密以防損污況親之遺骨當如何哉世俗淺識惟欲不見而已又有求速化之說是豈知必誠必信之義且非欲其不化也未化之間保藏當如是爾吾自少時謀葬曾祖虞部以下積年累歲精意思索欲知何物能後骨而朽後聞咸陽原上有人

發東漢時墓柏棺尚在又韓修王城圮得古柏木皆
堅潤如新諺有松千栢萬之說于是知柏最可以久
然意猶未已因觀雜書有松脂入地千年為茯苓萬
年為琥珀之說疑物莫久于此遂以柏為棺而塗以
松脂特出臆計非有稽也不數月嵩山法王寺下鄉
民穿地得古棺裏以松脂乃知古人已用之矣自是
三十四年七經葬事求安之道思之至矣地中之事
察之詳矣地中之患有二惟蟲與水而已所謂無使

土親膚不惟以土為汚有土則有蟲蟲之侵骨甚可畏也世人墓中多置鐵以辟土獸土獸希有之物尚知備之蟲為必有而不知備何也唯木堅縫完則不能入求堅莫如柏欲完莫如漆然二物亦不可保柏有入土數百年而不朽者有數十年而朽者人多以為柏心不朽而心之朽者見亦多矣

高閑曰伊川先生謂棺之合縫以松脂塗之則縫固而木堅注云松脂與木性相入而又利水蓋今人所

謂瀝青者是也須以少蚌粉黃蠟清油合煎之乃可用不然則裂矣其棺槨之間亦宜以此灌之

朱子語類古禮難行為古人有做未到處古者以皮束棺豈能固設熬黍稷于棺旁以惑蚍蜉可見少智今棺用漆要三日便殯亦難

王文祿葬度合棺油杉為上拍次之油杉今沙坊板出馬湖建昌桃花洞揚宣慰旋螺丁子香花紫實上也但假者多耳莫若用柏紫經杉可也棺僅容身不宜太寬匠製若經匣樣底蓋不用鐵丁用柏或蘇木作鉸筍底蓋對牆合處每邊鑿二孔筍作鉸樣分三片先插左右二片八孔分開中一片鉸下鉸凹處到

劉佳矣且免鐵繡壞版釘擊震尸鉗筍法聞之
西泉錢子懋仁名簒仁孝士也以故能慎終

陳龍正曰製棺棺不可太寬太長如料富則量逝者
形軀裁減之勿惜損料尤忌太高必使高濶相等環
視見方為妥高則上空既無用而壙勢因之不得不
高墳勢因之不得不稍薄留棺中無用之空虛損壙
外宜厚之封土豈善計哉蓋不宜用釘釘縫漏氣又
釘長出亦使壙高其弊多端慎勿泥古古人亦有未
詳審處木唯杉最善不蛀不朽又無燥性有財則買
沙板乃千年老杉近根之幹壅頓沙土中者川陝深
山所生無財則買大杉木堅老者為之伊川先生獨
尚柏心柏過燥恐于初死骸骨有所未便又且易蛀
想宋時未起沙板之說也既得良木命良工試配已
畢臨攬合時一切縫罅先用絞淨真生漆厚調生麪
銀珠塗嵌其間然後推敲成就雖有小小鬆隙之處
皆為珠漆充塞無不混合之患矣試真漆法取少許

抹青竹上少頃即乾乾而粘綴不可剔剝者真否則已漫入桐油其性懈矣硃性極收濕凡漆物置密室中遇雨必生潤唯硃漆獨乾此其驗也故可以助漆之堅解漆之濕無踰此物棺外凡遇縫處亦用硃漆塗之棺底須塗抹今遍棺內止以少許抹縫餘處不可多用骸骨宜近木不宜近漆也俗用瓦灰猪血調塗又以麻布糊縫直同兒戲土中無物不朽此數物徒滋污穢有何功力不須十年必皆解散脫落又棺外以硃漆周圍塗之約數遍而止硃外又須以真生漆蓋之恐硃色太炫非入土幽玄之義加以晦色使可久安也

張文嘉齊家寶要棺木沙坊為上非貴價者不能堅美然中間多有破損巧于補綴未易辨識一售其欺反不若杉木之為愈也或取三丈四丈平木及裏溪之頭段為佳但要色老而紅赤縷細而堅實者取其

木心候其乾燥即可用也臨攪合時一切縫罅先用
絞淨真生漆厚調生麪銀硃塗嵌其間然後推敲成
就雖有小小鬆隙之處皆為硃漆充塞無不混合之
患矣試真漆法取少許抹青竹上少頃即乾乾而粘
綴不可剔剝者真否則已浸入桐油其性懈矣硃性
實收濕可以助漆之堅解漆之濕故須用之棺外凡
遇縫處亦用硃漆塗之棺底須塗抹令遍棺內止以
少許抹縫餘處不可多用骸骨宜近木不宜近漆也
俗用瓦灰猪血調塗又以麻布糊縫直同兒戲此數
物徒滋污穢有何功益邪又一法合縫時先以艤船
之油灰塗其內覆縣紙二三層其固甚于松脂外面
灌生桐油數次此法尤為簡便利于貧者然總非預
辦不可易得凡遇父母年老即當竭力為之不得與
兄弟分派爭較彼此推延以致倉卒誤事且古者國
君即位而為柩歲
一漆之况士庶乎

桐棺 柏棺

左傳哀公二年秋八月齊人輸范氏粟鄭子姚子般送之士吉射逆之趙鞅禦之遇於戚簡子誓曰志父無罪

君實圖之若其有罪絞縊以戮桐棺三寸不設屬辟

疏案

禮上大夫棺八寸屬六寸下大夫棺六寸屬四寸無三寸棺制也棺用難朽之木桐木易壞不堪為棺故以為
罰墨子尚儉桐棺三寸屬次大棺也辟親身棺也禮大
夫無辟唯屬與大棺為一重今云不設辟者時僭耳非
正禮也
素車樸馬
注以載柩疏素車無飾不以翬抑飾車也曲禮云大夫去國乘髦馬鄭云髦
馬不翬落也則此樸馬亦謂不翬落用此以載柩也他
柩皆人挽此用車馬載者道遠當用牛馬且此言亦為

罰無入于兆

注兆葬域不入兆域

鄭云戰敗無勇投諸塋外以罰

之此亦

下卿之罰也

注為自設罰所以能克敵

家語孔子之喪公西赤掌殯葬焉桐棺四寸柏棺五寸
墨子禹葬會稽之山桐棺三寸葛以緘之

莊子古者喪禮天子棺槨七重諸侯五重大夫三重
士再重今墨子獨生不歌死無服桐棺三寸而無槨
以為法式以此教人恐不愛人以此自行固不愛也
荀子刑餘罪人之喪桐棺三寸

越絕書禹葬會稽葦擗桐棺穿壙七尺上無漏泄下無即水

梓棺

漢舊儀梓棺長二丈廣四尺

風俗通義禮天子斂以梓器宮者存時所居緣生事
亡因以為名凡人之棺亦為宮也

王符潛夫論今者京師貴戚必欲江南擗梓豫章之
木邊遠下土亦競相倣效夫擗梓豫章所出殊遠伐
之高山引之窮谷入海乘淮逆河汴洛工匠雕刻連
累日月會衆而後動多牛而後致重且千斤功將萬

夫而東至樂浪西達燉煌
費力傷農於萬里之地

穀棺

墨子昔堯葬蛭山之陰穀木之棺葛以緘之舜葬南
已之市穀木之棺葛以緘之

樟棺

後漢書禮儀志諸侯王公主貴人皆樟棺洞朱雲氣畫
公特進樟棺黑漆

宋書禮志孝武帝大明五年閏月皇太子妃薨樟木為

觀號曰樟宮

松棺

魏書崔光傳光戒子孫曰吾兄弟自幼及老未曾一片不同弟頃橫禍權作松棺亦可為我作松棺使我見之

楸棺

盛弘之荊州記冠軍縣東一里有張詹墓魏太和時人也刻碑背曰白楸之棺易朽之裳銅錢不入瓦器不藏嗟爾後人幸不我傷

隸釋魏征南軍司張詹

榆棺

晉書徐苗傳遺命榆棺雜輓露車載尸葦席瓦器而已

雜木棺

續漢書楊震數切諫為樊豐等所譖遣歸本郡震行至城西夕陽亭乃慷慨謂其諸子門人曰身死之日以雜木為棺布衣單被裁足蓋形勿歸冢次

瓦棺

檀弓有虞氏瓦棺

帝王世紀有苗氏叛虞舜南征崩于鳴條殯用瓦棺

西京雜記袁盎冢以瓦為棺槨

隸釋武陽城東彭亡山之巔耕夫斲地有聲尋罅入
焉石窟如屋大中立兩崖崖柱左右各分二室左方
有破瓦棺

石棺

古史考蜚廉為紂使北方還無所報為壇霍太山而報
得石棺銘曰帝令處父不與殷亂賜爾石棺以華氏死

遂葬于霍太山

荊州記臨湘水中有石牀上有二石棺色綠如銅鏡

玉棺

風俗通義葉縣令王喬天下一玉棺於廳事前令臣吏試入不動搖喬曰天帝獨欲召我沐浴服飾寢其中蓋便立覆之宿葬於城東土自成墳

銅棺

越絕書闔閭冢在閭門外銅棺三重頌地六尺

革棺

西京雜記 廣川王去疾國內冢藏一皆發掘魏襄王冢入一戶石扉有闕鑰叩開見棺柩黑光照人刀斫不入燒鋸截之乃漆雜兕革為棺厚數寸累積十餘重力不能開乃止

朱棺

漢書佞幸傳大司徒孔光奏董賢賢自殺伏辜死後父恭等不悔過乃復以沙畫棺

師古曰以硃砂塗之而又雕畫也

四時之

色左蒼龍右白虎上著金銀日月玉衣珠璧以棺至尊
無以加

東觀漢記耿秉薨賜朱棺玉衣

明會典品官棺用油杉朱漆庶民棺油杉為上拍次之
土杉又次之用黑漆金漆

畫棺

謝承後漢書和帝追封太后父梁松為褒親愍侯改殯
賜東園畫棺玉押衣衾

後漢書袁安傳袁逢卒朝廷以逢嘗為三老特優禮制


賜以朱畫秘器

注秘器
棺也

布漆山

清異錄天成開運以來俗尚巨棺有停之中寢人立
兩邊不相見者凶肆號布漆山

枰



聶氏本

檀弓君即位而為柩

注柩謂地棺親尸者天歲一漆之

藏焉

注若未成然疏君諸侯也言諸侯則王可知人

謂地棺天子柩內有水兒諸侯無但用地內以親尸也歲一漆之者雖為尊得造未供用故不欲即成但每

年一漆示如未成也藏焉者謂藏物于中棺中不欲空虛如急有待也

裴松之曰禮天子諸侯之棺各有重數棺之親身者曰柩

方慙曰柩即所謂櫬也君尊雖凶禮之具亦豫備藏焉則惡人之見也

陸佃曰言歲一出而漆之于是又藏焉歲一出者若將有用也示使其君不敢有恃以情

乾學案豫凶事非得已也故漆而藏焉柩欲

堅故歲一漆之漆之斯出之矣疏謂中不欲
空虛而訓藏為藏物于中其說贅陸氏至謂
歲一出者示君將有用夫豫凶事猶不可況
可以此警其君為盡禮歟後儒說禮往往傳
會若此所以禮家多成聚訟也

舊唐書玄宗開元二十年自東都幸太原至太行坂路
隘逢柅車問左右車中何物左右奏曰禮天子出則載
柅車以從先王之制也上曰焉用此命焚之無柅自此

始也

柩

曲禮在牀曰尸在棺曰柩

疏三日不生斂之在棺死事究竟于此故曰柩

呂大防曰尸者未大斂柩者已大斂之稱也故喪禮未殯奠于尸已殯奠于柩

白虎通德論尸柩者何謂也尸之為言失也陳也失

氣亡神形體獨陳柩之為言究也久也不復章也

釋名尸已在棺曰柩柩究也送終隨身之制皆究備也

櫬

左傳襄公二年夏齊姜薨初穆姜使擇美櫬

注櫬梓以之屬

自為櫬

注櫬棺也欲以送終其身故以櫬為名喪大記云君大棺八寸屬六

寸梓四寸如彼記諸侯之棺三重親身之棺名之為梓

即櫬是也其梓用槨為之屬與大棺乃用梓耳此以梓為櫬者名之曰櫬其內必無棺也擇櫬為櫬其櫬必用梓也

季文子取以葬君子曰

非禮也禮無所逆婦養姑者也虧姑以成婦逆莫大焉

注穆姜成公母

齊姜成公婦

四年秋定如薨不殯于廟無櫬不虞

注季孫以定如本賤既無器備議其

喪制欲殯不過廟又不反哭

匠慶謂季文子

注匠慶魯大匠

曰子為正卿而

小君之喪不成不終君也

注慢其母是終事君之道

君長誰受其

咎

注言襄公長將責季孫

初季孫為已樹六櫨于蒲圃東門之外

注文子欲自為櫨

匠慶請木

注為定如作櫨

季孫曰略

注不以道取為略

匠慶

用蒲圃之櫨季孫不御

注御止也

君子曰志所謂多行無禮

必自及也其是之謂乎

疏季孫言略令匠慶略他木也官非無木可用意欲不成其喪

怒慶此請令略木為之慶又忿其如此故取季孫之櫨其意言遣我略人我只略女季孫令之為略匠慶奉命

而略雖自被略不得止之是自及也

小爾雅有尸謂之柩空棺謂之櫬

槨

漢書成帝紀河平四年民為水所流死不能自葬者令

郡國給槨積葬埋

師古曰槨積謂小棺

說文積小棺又曰槨

陸機大暮賦觀洪槨而為槨

裏棺 錯

喪大記君裏棺用朱綠用雜金錯大夫裏棺用玄綠用

牛骨錯士不綠

注鑄所以琢著裏疏裏棺謂以繒貼棺裏也朱繒貼四方綠繒貼四角定本

經中綠字皆作琢琢謂錯琢朱繒貼著于棺也錯釘也舊說云用金釘又用象牙釘雜之以琢朱綠著棺也隱義云朱綠皆繒也雜金錯尚書曰貢金三品黃白青色用玄綠者四面玄四角綠用牛角錯者不用牙金也士不綠者悉用玄也亦同大夫用牛骨錯不言從可知也

吳澄曰案定本近是蓋裏棺無用綠色無義疏說分二色貼四方四隅亦無義且未詳何據若依定本以綠為琢則朱玄句絕琢字屬下句士用玄裏棺與大夫同但不用釘琢之為異耳

張幼倫曰案錯字說文云綴著物者則綠字疑皆綴字之誤綴者綴繒于棺也錯即今漆工所用之灰屑也君用雜金屑最為堅確大夫用牛角屑次之今民間用瓦屑即此錯也士不綴無裏也舊讀綠為琢以

錯為釘皆誤也故王氏有牛角錯不可從之說案古者棺不用釘唯以皮條束合之見檀弓上篇

後漢書禮儀志安梓宮內珪璋諸物東園匠武士下釘衽截去牙

東園溫明祕器

漢書霍光傳光薨賜東園溫明如乘輿制度

服虔注東園處此器

形如方漆桶開一面漆畫之以鏡置其中以懸尸上大斂并蓋之

周密發辛雜識今世有大斂而用鏡懸之棺蓋以照尸者往往謂取光明破暗之義案漢書霍光傳光之喪賜東園溫明服虔曰東園處此器以鏡置其中以懸尸上然則其來尚矣

佞幸傳東園祕器珠襦玉押豫以賜董賢無不備具

師古

曰東園署名也漢書儀云東園祕器作棺梓素木長二丈崇廣四尺

晉公卿禮秩諸侯及從公薨者賜東園祕器

凶門柏歷

晉書禮志成帝咸康七年皇后杜氏崩有司奏大行皇后陵所作凶門柏歷門號顯陽端門詔曰門如所處凶門柏歷大為繁費傳之案蔡謨說以二瓦器盛始死之祭繫于木裹以葦席置庭中近南名為重今之凶門是

其象也范堅曰凶門非禮禮有懸重形似凶門後又出之門外以表喪俗遂行之

通典同詳見第七十四卷喪儀


通典東晉安帝隆安四年太后李氏崩詔于西堂設菰蘆神武門施凶門柏歷

宋書禮志文帝元嘉十七年元皇后崩兼司徒給事中劉溫持節監喪神虎門設凶門柏歷至西上閤

孔琳之傳琳之建言曰凶門柏歷不出禮典起自末代積習生常遂成舊俗爰自天子達於庶人誠行之有由

卒革必駭然苟無闕于情而有愆禮度存之未有所明
去之未有所失固當式遵先典釐革後謬况復兼以游
費實為民患者乎凡人士喪儀多出閭里每有此須動
十數萬損民財力而義無所取至于寒庶則人思自竭
雖復室如懸罄莫不傾產殫財所謂葬之以禮其若此
乎謂宜謹遵先典一罷凶門之式表以素扇足以示凶
隋書禮志後齊定令親王公主太妃儀同三司以上及
令僕皆聽立凶門柏歷開皇初太常卿牛弘奏凶門豈

設重之禮請革茲俗弊詔可



讀禮通考卷九十五